

Entiteti nemaju državnost



Visoki predstavnik Christian Schmidt još je jednom ponovio da Republika Srpska nije država, nego jedan od dva multietnička entiteta unutar suverene države Bosne i Hercegovine. “Kao takva, nema državnost”, izjavio je visoki predstavnik, komentirajući obilježavanje Sretenja kao “Dana državnosti RS”.

Sjećanja na historijska zbivanja koja se odnose na Srbe u 19. stoljeću ostaju neosporiva, ali se ona ne mogu zloupotrebjavati u današnjoj situaciji. Jedinstvo svih nas leži u evropskim integracijama.

“Dejtonski mirovni sporazum je jasan: entiteti pravno postoje samo na osnovu Ustava BiH i nemaju ‘suverenitet’ niti ‘državnost’. Republika Srpska, kao sastavni dio suverene države Bosne i Hercegovine, podliježe suverenitetu Bosne i Hercegovine. Uz to, Republika Srpska nije entitet srpskog naroda nego multietnički entitet u kojem su tri konstitutivna naroda (i Ostali) ravnopravni, a entitetski organi vlasti ne predstavljaju samo srpski narod”, naglasio je visoki predstavnik Schmidt. Visoki predstavnik apelirao je na sve političke aktere da poštuju principe Sporazuma, jer su oni pravni i ustavni temelj Bosne i Hercegovine. To je utvrđeno Dejtonskim mirovnim sporazumom.

Visoki predstavnik je također pozvao političke lidere i osobe na javnim funkcijama da svojim izjavama promoviraju stabilnost, dijalog i pomirenje, a ne podjele. “U potpunosti sam posvećen daljnjem poštivanju mira, stabilnosti i napretka, postignutim na osnovu Dejtonskog mirovnog sporazuma, u

interesu svih građana Bosne i Hercegovine", zaključio je visoki predstavnik Schmidt.